

DICURAHKAN!

HARI 1— Kenali Yesus sebagai Penyelamat Kita yang Hidup

Kisah Para Rasul 1:1-3

Masa Bersendirian dengan Tuhan

Doa

Tuntutlah Mazmur 119:105 dalam doa. Mintalah kepada Tuhan untuk mengutus Roh Kudus agar Firman Tuhan menjadi terang bagi perjalanan iman anda.

Terokai Firman

1. Baca Kisah Para Rasul 1:1–3. Apakah yang anda pelajari dalam petikan ini tentang Yesus?
2. Terokai keempat-empat Injil untuk melihat berapa kali Yesus menyatakan diri-Nya HIDUP kepada para pengikut-Nya selepas kebangkitan-Nya. (Lihat Matius 28:9–20; Markus 16:9–20; Lukas 24:13–53; Yohanes 20:14 hingga 21:25.)

Penjelasan daripada Ellen White:

Selama empat puluh hari Kristus tinggal di bumi, mempersiapkan para murid untuk pekerjaan di hadapan mereka dan menjelaskan apa yang sebelumnya mereka tidak dapat fahami. Dia berbicara tentang nubuat-nubuat mengenai kedatangan-Nya, penolakan-Nya oleh orang Yahudi, dan kematian-Nya, menunjukkan bahawa setiap perincian nubuat-nubuat ini telah digenapi. Dia memberitahu mereka bahawa mereka harus menganggap penggenapan nubuat ini sebagai jaminan kuasa yang akan menyertai mereka dalam pekerjaan mereka di masa depan. Kita membaca, “Lalu Dia membuka pintu pemahaman mereka supaya mereka mengerti maksud Kitab Suci. Dia berkata lagi, ‘Demikianlah yang tersurat: Bahawa Kristus harus menderita lalu bangkit semula daripada maut pada hari yang ketiga, dan perkhabaran tentang pertaubatan dan pengampunan dosa akan diisytiharkan demi nama-Nya kepada semua bangsa, mulai di Yerusalem. Kamulah saksi segala perkara ini.’”

Sepanjang hari-hari yang diluahkan Kristus bersama murid-murid-Nya ini, mereka memperoleh pengalaman yang baru. Ketika mereka mendengar Guru mereka yang dikasihi menjelaskan Kitab Suci berdasarkan semua yang telah terjadi, iman mereka kepada-Nya menjadi lebih teguh. Mereka tiba ke tempat di mana mereka dapat berkata, “Aku tahu akan Tuhan yang kupercayai.” 2 Timotius 1:12. Mereka mula menyedari sifat dan kebesaran pekerjaan mereka, untuk memastikan bahawa mereka harus memberitakan kepada dunia kebenaran yang dipercayakan kepada mereka. Peristiwa-peristiwa dalam kehidupan Kristus, kematian dan kebangkitan-Nya, nubuat-nubuat yang menunjukkan peristiwa-peristiwa ini, misteri rencana keselamatan, kuasa Yesus untuk pengampunan dosa—mereka telah menjadi saksi kepada semua perkara ini, dan mereka harus memberitakannya kepada dunia. Mereka harus memberitakan Injil kedamaian dan keselamatan melalui pertaubatan dan kuasa Juruselamat. (*Acts of the Apostles*, ms. 26, 27)

Fokus Doa

Luangkan sedikit masa untuk merenungkan hidup anda. Beritahu Tuhan beberapa cara Yesus telah menunjukkan kepada anda bahawa Dia hidup! Bersyukur kepada Tuhan kerana Yesus Kristus telah menyatakan diri-Nya sebagai Penyelamat yang hidup melalui jawapan kepada doa.

Lingkaran Keluarga/Sahabat

Aktiviti yang Menghubungkan

Jemput setiap sahabat atau ahli keluarga untuk menjelaskan sesuatu secara ringkas tanpa menamakannya. Berikan satu sebab mengapa ia masih hidup. Semua orang harus cuba meneka apa yang anda jelaskan. (Contoh: Ia mempunyai sayap dan tertarik kepada keindahan di ladang. Saya tahu ia masih hidup kerana ia berterbangan di udara!)

Doa untuk Roh Kudus

Berdoalah bersama-sama untuk Roh Kudus. Tuntutlah janji Lukas 11:13.

Terokai Firman

1. Baca Lukas 1:1–4 dan Kisah Para Rasul 1:1–3. Mengapakah Lukas menulis Injil Lukas dan kitab Kisah Para Rasul?
2. Bagaimanakah catatan Lukas dalam Lukas 24:36–43 menggambarkan Kisah Para Rasul 1:3?

Penjelasan daripada Ellen White:

Sebelum diangkat ke syurga, Kristus telah memberikan amanat kepada murid-murid-Nya. Dia memberitahu mereka bahawa mereka akan menjadi pelaksana kehendak yang mana Dia mewariskan kepada dunia harta kehidupan kekal. Kamu telah menjadi saksi kehidupan pengorbanan-Ku bagi pihak dunia, Dia berfirman kepada mereka. Kamu telah melihat pekerjaan-Ku untuk Israel. Dan walaupun umat-Ku tidak mahu datang kepada-Ku untuk memperoleh kehidupan, walaupun para imam dan pemerintah telah melakukan kepada-Ku seperti yang mereka kehendaki, walaupun mereka telah menolak-Ku, mereka akan mempunyai satu lagi peluang untuk menerima Anak Tuhan. Kamu telah melihat bahawa semua orang yang datang kepada-Ku, mengakui dosa-dosa mereka, Aku terima dengan tangan terbuka. Dia yang datang kepada-Ku tidak akan Aku buang sama sekali. Kepada kamu, murid-murid- Ku, Aku menyerahkan mesej belas kasihan ini. Ia akan diberikan kepada orang Yahudi dan bukan Yahudi—pertama, kepada Israel, dan kemudian kepada semua bangsa, bahasa, dan kaum. Semua orang yang percaya akan dikumpulkan ke dalam satu gereja. (*Acts of the Apostles*, ms. 27, 28)

Fokus Doa

Berdoalah bersama agar setiap orang dalam lingkungan keluarga dan persahabatan anda akan mengenali Yesus sebagai Penyelamat yang hidup. Selepas mendoakan ini untuk satu sama lain, berdoalah dengan menyebut nama keluarga dan sahabat-sahabat yang tidak mengenali Yesus secara peribadi.

Keluarga Gereja

Prosedur Pertemuan Malam Pertama

Pada malam pertama 10 Hari Berdoa, bentuk setiap peserta kepada kumpulan berbilang generasi yang terdiri tidak melebihi enam orang. Setiap kumpulan akan dipimpin oleh seorang dewasa dan seorang anak muda, seperti yang diterangkan dalam panduan pemimpin. Peserta boleh kekal dalam kumpulan yang sama selama 10 hari. (Jika peserta baru hadir pada malam-malam kemudian, bantu mereka berhubung dengan kumpulan sedia ada, atau mulakan kumpulan yang baru jika perlu.)

Setiap malam, para peserta boleh duduk bersama kumpulan mereka sementara seorang pemimpin membimbing semua orang menjalankan doa dan aktiviti. Pemimpin kumpulan kecil akan memudahkan perbincangan dalam kumpulan mereka sendiri apabila diperlukan. Kadangkala peserta akan berinteraksi bersama, kadangkala mereka akan berdoa dan berbincang dengan ahli kumpulan kecil mereka, dan kadangkala mereka akan diminta untuk berdoa secara senyap. Seorang pemimpin yang fleksibel dan bijaksana boleh menggerakkan aktiviti-aktiviti dengan lancar dan menyesuaikan bahan berdasarkan keperluan.

Selamat datang

Ibadah dalam Doa

PEMIMPIN KEPADA SEMUA: Duduk bersama kumpulan kecil anda. Pasukan berdoa kami akan menjemput kumpulan kecil anda untuk berdoa melalui Firman Tuhan bersama-sama. Selepas berdoa selama beberapa minit, anda akan mendengar pasukan berdoa mula menyanyikan satu rangkap sebuah lagu. Apabila ini berlaku, sila beralih daripada berdoa kepada bernyanyi.

Pujian:

1. (KUMPULAN KECIL) Dengan Alkitab anda terbuka kepada Yesaya 53, carilah sifat-sifat khusus Yesus. Pujilah Tuhan untuk setiap sifat Yesus.
2. (SEMUA) Nyanyikan lagu pujian.

Pengakuan:

1. (KUMPULAN KECIL) Baca Yesaya 53:5. Luangkan masa untuk pengakuan dosa secara peribadi.
2. (SEMUA) Nyanyikan lagu tentang rahmat Tuhan.

Permintaan:

1. (KUMPULAN KECIL) Baca Yohanes 16:13. Berdoalah agar Roh Kudus datang dan mengajar kita kebenaran.
2. (SEMUA) Nyanyikan lagu tentang Roh Kudus.

Aktiviti yang Menghubungkan

PEMIMPIN KEPADA SEMUA ORANG: Berdua atau bertiga dalam satu kumpulan. Tanyakan antara satu sama lain, "Apakah tiga fakta menarik yang anda ingin orang lain tahu tentang anda?" Kongsikan antara satu sama lain selama beberapa minit. Kita semua mempunyai banyak fakta menarik yang boleh kita pelajari tentang satu sama lain. Selepas Yesus mati di kayu salib dan dibangkit dari kubur, Dia mempunyai sesuatu yang istimewa yang Dia ingin semua orang tahu tentang diri-Nya.

Ibadah dalam Firman

(KUMPULAN KECIL)

1. Baca Kisah Para Rasul 1:1–3. Sila perhatikan dalam ayat 3 sesuatu yang Yesus ingin semua orang tahu. Yesus "menampakkan diri-Nya dalam keadaan HIDUP kepada mereka selepas kesengsaraan-Nya dengan banyak keterangan sahih."
2. Baca Lukas 24:13–32. Perhatikan terutamanya ayat 27. Apakah yang dilakukan oleh Yesus untuk menyatakan diri-Nya kepada dua orang pengikut-Nya?
3. Perhatikan ayat 32. Apakah kesaksian peribadi kedua-dua murid itu setelah mereka menyedari bahawa mereka telah bersama Penyelamat yang hidup?

Penjelasan daripada Ellen White:

Demikianlah Kristus berkhotbah kepada murid-murid-Nya, membuka minda mereka agar mereka dapat memahami Kitab Suci. Murid-murid itu letih, tetapi perbualan itu tidak tenggelam. Kata-kata kehidupan dan jaminan diucapkan dari bibir Juruselamat. Mata mereka tetap tertumpu. Ketika Dia memberitahu mereka tentang kejatuhan Yerusalem, mereka memandang kota yang ditakdirkan itu dengan tangisan. Tetapi mereka masih mengetahui siapa teman perjalanan dengan mereka. Mereka tidak menyangka bahawa subjek perbualan mereka sedang berjalan di samping mereka; kerana Kristus merujuk diri-Nya seolah-olah Dia adalah orang lain. Mereka menyangka bahawa Dia adalah salah seorang daripada mereka yang telah hadir di pesta besar itu, dan yang kini sedang kembali ke rumah-Nya. Dia berjalan dengan berhati-hati seperti mereka di atas batu-batu yang kasar, sekali-sekala berhenti bersama mereka untuk berehat sebentar. Demikianlah mereka meneruskan perjalanan di sepanjang jalan pergunungan, sementara Dia yang akan segera mengambil kedudukan-Nya di tangan kanan Tuhan, dan yang boleh berkata, "Segala kekuasaan telah diserahkan kepada-Ku, baik di syurga mahupun di bumi," berjalan di samping mereka. Matius 28:18. (*The Desire of Ages*, ms. 800)

Fokus Doa

PEMIMPIN KEPADA SEMUA ORANG: Kadangkala sebagai seorang Kristian, kita bertindak seolah-olah Yesus Kristus masih berada di dalam kubur! Yesus meluangkan masa 40 hari selepas kebangkitan-Nya secara peribadi meyakinkan para pengikut-Nya yang setia bahawa Dia adalah Penyelamat yang HIDUP.

Marilah kita berdoa dalam kumpulan kita agar kita tidak buta terhadap Penyelamat kita yang hidup. Marilah kita berdoa agar Tuhan membuka mata kita untuk mengetahui bahawa Yesus hidup dan hadir dalam hidup kita melalui kuasa Roh Kudus.

Panggilan

PEMIMPIN KEPADA SEMUA: Siapakah di sini pada malam ini yang yakin akan keperluan mereka untuk menyerahkan semula hati mereka kepada Penyelamat yang hidup dan untuk mengenali Dia dengan lebih mendalam setiap hari? Saya menjemput semua yang ingin menyerahkan semula hati mereka kepada Yesus sebagai Penyelamat yang hidup untuk berlutut di mana anda berada sekarang.

Cabaran 24 Jam

PEMIMPIN KEPADA SEMUA: Dalam tempoh 24 jam akan datang, matikan semua peranti elektronik selama 10 minit. Baca Mazmur 46 secara peribadi—hanya anda dan Tuhan. Puji Yesus Kristus kerana menjadi Tuhan yang hidup! Mintalah Roh Kudus untuk meletakkan seorang insan di hati anda, dan kongsikan dengan orang itu satu sebab anda tahu Yesus masih hidup. Baca Kisah Para Rasul 1:6-8 sebagai persediaan untuk hari esok.